





後山先生逸詩目錄

卷一

五言古詩四十首

和蘇公洞庭春色

山口阻風

登冥山

次韻答少章

送路紉歸老丹陽





謝傅監

次韻答秦少章

次韻答子實少章二首

寄晁以道

寄邢和叔

贈關彥長

平翠閣

次韻應物有歎黃樓

秋懷十首

次韻蘇公西湖觀月聽琴

春酬應物

次韻德麟督叔弼季默詩及破余酒戒

次韻蘇公獨酌

次韻蘇公獨酌試藥玉滑盞

次韻德麟植檜

送叔弼寄秦張

次韻德麟吳越山水

龍潭



後山詩目録  
贈魯直

次韻蘇公竹間亭小酌

送李奉議亳州判官四首

大風

卷二

七言古詩一十三首

擬古

贈知命

大風

回風行

贈張文潛

次韵寄答晁无咎

送鄜州關司法

古怨

次韻蘇公蠟梅

奉陪内翰二友醴泉避暑

送張秀才兼簡德麟

寄子閔



後山遺言目錄  
贈黃氏子小德

雜體三首

登鳳凰山懷子瞻

晁无咎畫苑

鷺鵲詩并序

卷三

五言律詩五十九首

山口

次韵夜雨

晦日

登城樓

奉賀陳聖子

和王子安至日三首

送張衡山

除夜對酒贈少章

庚辰三月上旬登白門閒望

送王君玉赴試

奉送閻醇老推官



後山遊詩目錄  
答李簿

九月十三日出善利門

送章推官

湖上晚歸寄詩友四首

寄答顏長道二首

春晚遊寶雲寺

夏日書事

晚遊九曲院和章秀才

次韻順法師十三間樓避暑

賀關彥長生日二首

錢塘寓居

寄寇荆山

還江山

雜題二首

秋後五日應物無詩豈年志俱壯未解傷秋耶

以詩挑之

寄晁說之

再贈寇司戶



後山遊詩目錄  
五  
巨野泊觸事

東阿

甲亭

遊鵲山院

登鵲山

別威德寺

雜題

和董判官寺居作

贈白闍黎

舒御史太夫人挽詞

和賈明叔秋晚見懷

望夫石

夏杪

虞美人草

沈道院有水墨壁畫奇筆也惜其窮年無買之  
者賈明叔請余同賦

同蘇不疑避暑法寺

和彥詹題遠軒



寄君玉

次韵遊花洞

夜坐有懷

送張芝卿

行次舊縣寄立之

送晁奉議高郵判官

五言排律二首

同道士錢冷然尋澗水源

五言賀雨

卷四

七言律詩五十一首

寄文潛无咎少游三學士

連日大雪以疾作不出聞蘇公與德麟同登女

郎臺

立春

贈王聿修商子常二首

次韵敬酬元弼三兄

和賈耘老春晚



後山遺詩目錄  
次韵寇秀才寄下邳家兄

賀文潛

送章氏兄弟兼寄金山寧禪師

寄曾公權

次韵關子容湖上晚飲

和休文至日新安

酬應物見戲

城南

次韵楊內翰贈諸進士

次韵寇司戶春懷

陳詢秀才歸徐

登彭祖樓

寄子開

寄徐吉父學士

和南豐先生西遊之作

和南豐先生出山之作

和張次道再遊翠岩之作

初到錦城



後山遺詩目錄  
何復教授以事待理

和富中容朝散值雨感懷

謝贊闍黎見訪

和蒲左丞有美堂座上觀雪二首

和秦太虛湖上野步

和沈世卿推官見寄

和劉元樂月夜寄賈耘老

酬呂明父學士

送傅子正宣義

和元樂銷暑樓曉望

和寄朱文中

和王明之見寄

和酬施和叟宣德

呂使君生日

送澤之過維揚

和和叟第課還自都下

和和叟梅花

再到錢塘呈會宗伯益



簡揚安國

簡李伯益

九日無酒書呈漕使韓伯修大夫

過杭留別曹無逸朝奉

簡令由司理

張謀父乞花

寄子閔

卷五

五言絕句八首

江湖堂

眠雲齋

擬李義山柳枝詞五首

萱草

七言絕句四十三首

嘲无咎文潛二首

寄都下故人示王子安

擬漢宮詞三首

秦少章見過



絕句

十八日觀潮四首

十七日觀潮三首

月下觀潮二首

宿錢塘尉解

寄北山順法師二首

贈大素 軻律師二首

贈寫真禧道人

次韵性都正北山逐涼

叔父惠鉢三首

次韵蘇公謁告三首

放歌行二首

戲元粥四首

送王生兼寄西堂圖澄禪師

讀白樂天臨水坐詩

次韵黃無悔惜梅

酒戶獻花以奉先聖戲作

謝田氏



南臺

馬上口占呈立之

後山先生逸詩目錄終

後山先生逸詩卷一

後學 陳唐 編

五言古詩

和蘇公洞庭春色

洞庭千木奴寸絲不挂手來輸步兵廚釀作青田酒王  
家玉東西未覺歲華走方從羅浮山已作南陽壽還將  
甕頭春慰予雪入牖我方縛禪律一舉煩屢嗅東坡酒  
中仙醉墨粲星斗詩成以屬我千金須弊帚何曾樽俎  
間著客面鰲黝定須笑美人蘸甲不濡口



山口阻風

夕風朝未回來雲去爲雨繫舟直山口天意遽如許  
濤風兩方鬪丘原莫當怒兩山爲俯仰一鳥不得度  
臨深負高枕偷生寧得所歷歷數過帆當途氣如虎  
快意亦適然淹泊豈吾取遡洄更去留未易相爾汝  
行登東山顛壯觀前來覩九澤不滿眼五丈方一縷  
茲山昔誰遊巨野傳自古菰魚無凶年末利猶不禦  
荷隩活萬人梨埒視千戶東方富絲麻小市歲百賈  
連檣自南北行談雜秦楚向晚風力微湖清魚可數  
空倉烏鳥樂外舍窗

靡語身非天下惜家無十金聚欲留盜賊迫欲去波濤  
怒兩者爾何從一死吾未與

登冥山

東山如覆盂石墪仍數層昔人行樂處時過名不稱  
秋風變草木樵徑餘新蒸四顧一水間不復知溜澗  
菰蒲萬世利煙火千人曾平生登山腳歲晚如不勝  
求田君勿問撫髀吾何能飛鴻將目遠秋水留心澄  
茲遊豈不朽作歌記吾曾

次韵答少章



秦郎淮海士才大難為弟蔚然霜雪後不受江漢洗春  
畦不滿眼來掇到芹薺多病促餘年秋光欲辭抵儒林  
丈人行掘起三界底出入銀臺門為米不為醴白頭容  
北面斯文分一體媿我無異聞口闕不得啓

送路紉歸老丹陽

身退不待年意足不得餘寧聞有餘論但問我何如才  
名四十年盛氣蓋諸儒獨無金水力竟與鼃黽俱晚為  
府中掾直前不趨趨曾何愧俯仰頗亦困囁嚅有粟尚  
可餬有酒尚可娛一朝脫章綬用意不躊躇富貴亦何

有惜君寧挽裾人生一世間僅得還其軀謝公江海人  
此許竟亦疎千金一大錢兩子雙明珠妙語發幽光東  
坡為歛歔不知兩疏去能亦有此無聊為三徑資從子  
並門居

謝傅監

好士如好色昔聞今則無平生席為門未識長者車曠  
士慕林谷羈人辱泥塗願為執鞭役莫順下風趨去年  
辱公先懷刺留寓居我往拜其門鶯鶯鳴高梧論交不  
計年取材忘其愚一寒我如此百鎰公無餘今年賀公



歸乃復過我廬當使有近行鷹門有長須小家不耐事  
雞飛犬升閭莫歸自有恨親顏一何娛汝家吾無憂能  
致賢大夫吳公漢庭右賈生世用疎平分太倉粟盡讀  
鄴侯書士爲知己留不爲食有魚三言移曾母投杼公  
何如

次韵答秦少章

學詩如學仙時至骨自換縹緲鴻鵠上衆目焉能玩子  
從淮海來一喙當百難師儒有韓孟拭目互驚惋老生  
時在傷縮手愧顏汗黃公金華伯莞爾回一盼彼方試

子難疾前不應懦要當攻石堅勿作搏沙散白璧雖具  
美礪錯加璀璨我老不足畏後生何可慢

次韵答子實少章

英英黃金花論時不論美靖節骨已朽棄捐乃其理兩  
公意有餘采采今未已尚念白頭生臨風嗅霜蕊  
交新情已故室遠人則邇杯酒不相忘一朝得二子初  
花美無度後時終可鄙與汝臥秋風看君雙控鯉

寄晁以道

兩官俱爲鄰常若千里遠經年不通書子孰知我懶相



期宇宙外肯復校繁簡我愚亦知此子意豈不滿子教  
東方生自視何益損人言不當價一錢萬金產須子五  
千卷丹筆校黃本子家太史氏名成南北阮道山鴻鴈  
行豈惟私門衎功名須老大四十未為晚快意會有違  
急行寧小緩忽有河山阻遂恐消息斷我獨不念此人  
窮令智短子勿放我慵書來慰愁眼

寄邢和叔

昔作梁宋遊幽憂廢朝昏閉門無往還不厭兒女喧隔  
墻聞剝啄暮夜誰叩門知是邢夫子低回過高軒願為

布衣交不顧年德尊匆匆立談罷又見東南奔江湖多  
病後僅免餉魚鼈久廢數行書因人問寒暄但愛孤山  
西松筠數家村便欲築居室插秧仍灌園生前不自愛  
身後何足論草玄笑揚雄贊易悲虞翻文章徒自苦紙  
筆莫更存却尋南郭老隱几學忘言他日宦遊客誤入  
桃花源葦間見漁父誰識王侯孫

贈闕彥長

少年初識字已誦子虛賦嘗疑天上人已離人間去蹉  
跎二十年久自歎遲暮倦遊梁宋間却踏江湖路此地



始逢君秋陽破朝霧白首鬢毛新青衫顏色故問君胡  
爲然竟坐文字誤人事久難知高才常不遇論人較賢  
智富貴寧在數不見竹林詩山王俱不與湖塘發高興  
山林有佳處迨此閒暇時觀遊莫辭屢功名如附贅得  
失何用顧但當勤秉燭長願隨杖履

平翠閣

我家山水間耳目厭華麗聞道浙西山經年通夢寐從  
爲遠游客忘却歸來計欲置湖上田謝絕人間世湖山  
多變態橫斜光氣異隨山轉朱閣臨顧窮幽邃惟存宣

公樓浮空堆亂翠疑是水仙人臨墻露高髻道人亦愛  
山朝昏閱終歲最愛煙雨中半撩青羅袂我來悲歲晚  
風霜掃昏翳不見嶺頭雲未盡登臨意

次韻應物有歎黃樓

一代蘇長公四海名未已投荒忘歲月積毀高城壘斯  
樓亦何與與人壓復起紛紛徒爾爲長劔須天倚循分  
即可久吾行誰與止邇來賢達人五十笑百里賴有寇  
公子衆毀聞獨美直氣懾狂童牽聯皆可紀少公作長  
句班揚安得擬頗有喜事人睥睨欲槌毀一朝陵谷變



後山詩卷一  
天語含深旨驚倒樓前人今朝有行履

秋懷十首  
以兩荒深院菊霜  
倒半池蓮為韵

昨日山中雲今朝山下雨牛羊沒禾黍蟋蟀促機杼磨  
刀洗盆瓮社臘不勝數豈無聚斂吏觸手丞相怒  
有家洙泗間歲晏榛棘荒稍知田家樂感此歸意忙老  
馬甘伏櫪遊魂還故鄉四十尚無君天下未敢忘

採薪墟墓間行歌當歸耕向來輕薄子懷護以為榮喘  
喘轅下犢力盡官泥深壯哉八百里一割探其心

翩翩王侯孫館我翠微院到飯隨鐘魚朝昏黃庭卷中

年妻子累往世西方願獨無詩書力尼父安得怨

黃公輕千乘尚愛五斗祿風雨聽朝鷄歲月老松菊平

生白蓮社不受一塵觸識字即投閣貴者須食肉

昔作九日期一覽知四方夜雨秋水深烈風畏褰裳樽

空囊亦空花且為我黃官奴覆青綾破屋任飛霜

翼翼陳州門萬里遷人道雨淚落成血著木木立槁今

年蘇禮部馬跡猶未掃昔人死別處一笑欲絕倒

籊籊孤竹君長我一身半凜然霜雪間時至亦陰換共

與王子猷永結忘言伴可使溪壑姿充我眼中玩



北闕書不上南山田不歸朝暮陳州門悠悠此何爲我  
老何所爲暖日聊差池君聽城山烏啞啞端爲誰  
潭潭光明殿稽首西方仙平生修何行步有黃金蓮我  
豈惜好徑報以履下穿洗足坐道場卒卒此何緣

次韵蘇公西湖觀月聽琴

公詩端王道亭亭如紫雲落世不敢學謂是詩中君獨  
有黃太史抱杓挹其尊韵出百家上誦之心已醺黃鍾  
毀少合大裘擯不文世事如病耳蠹鬪作牛聞苦懷太  
史惠養豹煙雨昏後世無高學舉俗愛許渾

春酬應物

論世闕真是憎好成愚賢衆手挽跛牂擬度驂騮前與  
子早相好於今不知年自從欲著帽憂喜同華顛生世  
知風化高下亦偶然填溝偶不死揮刃忽自全病馬試  
春早枯魚縱奔川稍思升斗祿筦庫未闕員一飢尚可  
忍百歲當復延相余乘下澤得句要子宣此生期樂死  
他日須詩傳縮手著袖間彈碁一爭先

次韵德麟督叔弼季默詩及破余酒戒

歲月不相貸夜牀衾篔秋朝來明鏡中作意多少留惟



酒可爲娛顧我非其流丈夫意氣合瓊玖不循鉤意行  
無人非駿發不中休相逢問何如頗復中之不清坐豈  
不好致真豈糟丘兩歐以詩鳴與俗同沉浮百鳥畏嘲  
弄往和長鳴鷗相寧忍快便風飄萬斛舟

次韻蘇公獨酌

雲月酒下明風露衣上落是有何好草草成獨酌使  
君顧爲客老子興不薄飲以全吾真醉則忘所樂未解  
飲中趣中之如狂藥起舞屢跳踉罵坐失酬酢終然厭  
多事超然趨淡薄功名無前期山林有成約身將歲華

晚意與天宇廓醒醉各有適短長聽鳧鶴

次韻蘇公獨酌試藥玉滑盞

仙人棄餘糧玉色已可欺小試換骨方價重十冰蘂灌  
以長白虹渺若江海瀾浮之端不惡舉者亦何辭但愧  
聞道晚早從鴈門師律部無明文可復時中之汝陽佳  
少年三斗出六奇家有持杯手兩好當一施風吹酒面  
灰月度杯心遲百年容有命一笑更須時

次韻德麟植檜

種木待成材聊爲十年事目中趨百里寧問萬牛費植



後山詩卷一  
檜三尺強已有凌雲氣生世能幾何擬作千歲計衆人  
笑拍手君子用其意蕭蕭孤竹君忘言理相弊名以金  
石交椿楊豈奴婢緬懷萬仞顛千丈蔚蒼翠蟠根泉石  
底用意霜雪外寧須大厦才坐待斧斤至散爲風雨聲  
密作牛馬蔽

送叔弼寄秦張

廬陵四公子吾友識其半叔也英達人平易亦稍悍於  
時吾始壯敗壁不塗墁孤身客東都轉食諸公館時來  
叩君門百過不留難傾心倒囊笈燕語徹昏旦磬折挽

爲親少得而多患相過汝穎上歲月不勝歎君才得公  
餘十日而十歲舌端懸日月筆下來江漢此行不尋常  
談者方一貫逸足寧小試寶刀當立斷用意不崎嶇欲  
得志挾彈目今平生親稍作春冰泮因聲督張秦書來  
不應緩

次韵德麟吳越山水

吳山那可說已覺心耳靜忍事如忍欲可遏不可騁人  
生如此耳黃白滿朝鏡寧懷斗升粟不理東南艇君從  
湖上歸頗說寒事竟沙草柔動色溪喧魚不定煩君冰



玉句無作江湖興君詩如靜女妙絕人所敬不更風雨  
秋下有桃李徑試寫孤竹君名成三絕鄭

龍潭

清淵下無際落日回風瀾凜然毛髮直敢以笑語干陂  
陀百尺臺葱翠萬木蟠驚飈振積葉清霜作朝寒水旱  
或有差精禱神其難魚龍同一波信有水府寬向來三  
日雨賴子一據鞍何以報嘉惠寒瓜薦金盤萬口待一  
飽歸臥神其安猶須雪三尺盛意莫得闌

贈魯直

相逢不用早論交宜晚歲平生易諸公斯人真可畏見  
之三伏中凜凜有寒意名下今有人胸中本無事神物  
護詩書星斗見光氣惜無千人力負此萬乘器生前一  
尊酒撥棄獨何易我亦奉齋戒妻子以爲累君如雙井  
茶衆口願其嘗顧我如麥飯猶足填飢腸陳詩傳筆意  
願立弟子行何以報嘉惠江湖永相忘

次韵蘇公竹間亭小酌

自昔有遺韵小飲不盡觴坐待竹間月奈此雲影長起  
行林下路散策踰平岡破眼一枝春著意十葉黃暄寒



會有分蜂蝶來無央鳥語帶餘寒竹風回妙香緬懷兩  
公子 朝陽斯人班馬後如圭復如璋相逢子無  
得佳處每難忘

送李奉議亳州判官四首

謝公中年後畏與親友別數日懷抱惡每笑冠纓絕生  
有四方事死當一語決前笑今則悲吾衰擬何說著鞭  
何必先倒筆不容掣鞭爾轅下駒萬里一改徹  
祈氏號外府藏室多異書因公有餘力一覽意何如為  
學雖日益受益不受誣正須高著眼濠梁有遊魚

吾友孫子實愛學吾所畏持身如處子得句有餘味交  
驩艱難際凜然見名誼吾病臥里中車馬日一至遣醫  
餽梁肉憂喜見顏際殷勤勸加餐代我破戒罪一別已  
三秋君室乃其季輪囷見眼中不作千里外因聲問何  
如胡不枉一字

吾友張文潛君行乃其里當年釣遊處壯者或可指聞  
風起遐想意作千古士不知塵土中奴推婢不齒胸中  
無一塵筆下有百紙勿問見自知未語君已喜與遊今  
已後行矣勿停軌



大風 梁山泊

積陰風易作隆寒聲益急百為定有數一動必三日奔  
 墮水勢壯擗扶波頭立前行後浪一作者促突起勇交射  
 崩騰萬騎來倏忽一箭拱摧殘蒲葦盡簸蕩魚龍泣私  
 憂地軸脫已分梁山沒向來萬斛重不作一葉直舟行  
 兩水間觸突聲悉率路轉帆舉落舟排冰壘積經事長  
 一智中人祈知識千金不垂堂豈復待一失窮途得偉  
 觀老氣猶少色事定不敢忘嗟來庶可及

後山先生逸詩卷一

後山先生逸詩卷二

後學 陳唐 編

七言古詩

擬古

盎中有聲囊不癭燕息不如帶加緊人生七十今已半  
 一飽無時何可忍公侯早歲有如此奴婢蓐食支夜永  
 向來糠覈之子孫居鄰無傳家存井

贈知命

黑頭居士元方弟不肯作公稱法嗣外人怪笑那得知



他日靈山親授記學詩初學杜少陵學書不學王右軍  
黃塵扶杖笑鄰女白衫騎驢驚市人靜中作業此何因  
醉裏逃禪却甚真顧我無錢呼畢曜有人載酒尋子雲  
君家魯直不解事愛作文章可人意一人可以窮一家  
怪君又以才為累請將飲酒換吟詩酒不窮人能引睡  
不須無事與多愁老不欲醒惟欲醉

大風

飛沙破面風裂石平林隱隱傾霹靂野火燎原塵漲天  
道聞馬嘶不相得老翁強欲作少年立馬堦除起無力

城南桃李春意動少待明朝莫相失

回風行

懸流洶洶從天來南風五日鬪不開御風起柁虎著翼  
衝風繫纜顏死灰昨日逆風今日回萬人莫挽才浮杯  
篙牽相賀天意得秋聲滿帆風倒桅天留異態須一怒  
造物可得無嫌猜

贈張文潛

張侯便然腹如鼓飢雷收聲酒如雨讀書不計有餘處  
尚著我輩千百許翻湖倒海不作難將軍百戰富善賈



弟子不必不如師欲知其人視其主秋來待試丞相府  
穀馬礪兵吾甚武問周不敵問其語一戰而霸在此舉  
百年富貴要自取人將公卿退爾汝德如墨君誰敢侮

次韵寄答晁无咎

西湖欲雨樹煙滿風葉倒垂雲覆盃望湖樓上白頭人  
獨倚欄干誰肯伴獨有詩人記病身清風千里寄行塵  
豪華信有回天力驚開桃李閒新春往事不回如過雨  
醉夢恍然忘惡語前在澶州有讀无咎文編詩因以戲之无咎今以為言人生如  
幻此何尤未信黃金貴於土愛子千篇頃刻成借將胸

腹詫吾人吟哦怪有芳鮮氣却被湖山識姓名

子瞻詩云遊徧

錢塘湖上境歸來文字帶芳鮮

文章廢退知難強身外虛華本無望何

曾臨水惜芒鞋却解逢人拈拄杖眼根清淨塵不留登  
伽過盡不回頭來詩云不應越女三年留家在中原歸未得江淮斷  
道無行舟兩山相逢翻手疾欲謀一笑寧無日却慚懷  
璞似周人祇可聞名不須識

送鄜州關司法

早歲相知晚相識抵掌回頭已陳迹萬里從軍壯此行  
一筋鱸魚留不得夜靜關山秋月明莫聽嶺頭流水聲



平世功名須少壯看君一箭下遼城

古怨贈關  
彦長

世態輕浮君莫道相逢何必論才調鉛刀快利莫助遲  
果下翩翩望雲老人前安得無窮好應須富貴長年少  
莫教白髮更棲遲不遭毀罵逢人笑

次韵蘇公蠟梅

化人乃作 花何年落子空三家羽衣霓袖澆香蠟  
從此人間識尤物青瑣諸郎却未知天公下取仙翁詩  
烏丸鷄距寫玉葉却怪寒花未清絕北風驅雪度關山

把燭看花夜不眠明朝詩成公亦去長使詩仙誦佳句  
湖山信美更負人已覺西湖屬此君坐想明年吳興越  
行酒賦詩聽擊鉢

奉陪內翰二友醴泉避暑

疾雷倒海不成雨墨雲御日吞不吐深院回廊晝景長  
青簾朱幕風鈴語神仙中人龍作馬翠旌絳節從天下  
竹冠芒履紫綺裘曳杖林間觀物化青蓮照眼自生涼  
修竹回陰欲過廊樽酒未空高興動含毫欲下雲飛揚  
俗間道士業符醫未語已作庸人樣但知一扇博百金



後山詩卷二  
豈識雙松到千丈蠅頭小字密著行四座歡叫醒而狂  
忽驚天姥到庭戶風篁露草鳴寒蠶回天却日有餘力  
小試席間留翰墨請公慎用補天手入佐后皇和五石  
送張秀才兼簡德麟  
長安千門憎熱客我獨憐君來解熱呼兒具飯懶出口  
藜羹不糝甘一啜北州別駕玉刻麟索書往見良可人  
驛使別來無一字知有此情誰與親

寄子閔

煙昏曉寒風發屋行者抽蓬離者哭青衫白髮兩相鮮

積雪朝陽眩雙目猛虎食子有分羹潔鷺割股謀補肉  
妻孥不用哭窮途前府故人風義篤

贈黃氏子小德

黃童三尺世無雙筆頭衮衮懸秋江不憂老子難為父  
平生崛強今心降我來喜與阿戎語應敵縱橫如急雨  
生子還如孫仲謀豚犬漫多何足數黃家小兒名小德  
看如長林目如漆只今數歲已動人老人留眼看他日  
笑君老蚌生明珠自笑此物我家無君當置酒我當賀  
有兒傳業更何須



雜體

登鳳凰山懷子瞻

蜿蜒曲龍腹山間隱樓觀孤高伏龍角浮圖刺雲漢修  
林霜雪餘落葉青紅亂想見洞中人不知時節換咳唾  
落江東江東兩眼中舉頭觸浮雲大腳驚飛鴻逢人自  
笑謀身拙坐使紅塵生白髮入山便欲棄人間出山又  
與松筠別數篇曾見使君詩前後登臨各一時妙舞新  
聲難得繼清風明月却相宜朱欄行遍花間路看盡當  
牙題壁處更有何人問使君青春欲盡花飛去

子瞻詩  
云應問

使君何處去憑  
花說與春風知

晁无咎畫苑

卒行無好步事忙不草書能事莫促迫快手多麤疎君  
看荷葦櫛扇崔家仲叔三人俱掃除事物費歲月收  
完神氣忘形軀恍然有得奪天巧衰顏生態能相如市  
師信手無贏餘一日畫出東封圖眼前百口怪神速背  
後十指爭挪揄君家畫苑傾東都錦囊玉軸行盈車補  
完破碎收亡逋欲得不計有與無問君此病何當祛君  
言無事聊自娛世間何事非迷途挾策未必賢樗蒲苑



中最愛文與蘇情親不獨生同間自謂知子誰知余叔  
也不癡回不愚憐君用意常勤渠揮毫灑墨填空虛風  
梢雨葉出新意老樹僵立何年枯我生百事不留意外  
物不足煩毆除翰墨才能記名字模臨寫貌無工夫見  
溺不救危不扶獨無一物充庖廚看君髮漆顏丹朱意  
氣健如生馬駒逢人不信六十餘郁然一莖無白鬚呂  
公落莫起釣屠南山四老東宮須人生晚達有如此應  
笑虞翻早著書

鷺鵲詩

并序

辛巳夏四月庚戌日將晏與客追涼露坐有雀引  
雛二三集垣下行且哺俄有鵲至自北俯喙雀間  
初循循少焉得雀遽攫一雛而升於垣出雀不意  
雀悲鳴啾啾奮身抵鵲再三欲奪鵲竟磔雛以食  
不顧如得計然坐客歎息余感之賦詩  
若奚不鷓吾知避而遷汝胡不狸吾知遠而馳宵邇吾  
巢晨並吾枝懷毒妊凶初不汝期恭恭拳拳甫笑嬉嬉  
情貌深厚孰從而追



後山先生逸詩卷二

後山先生逸詩卷三

後學陳唐編

五言律詩

山口

湖闊疑無地  
河回忽見山  
登臨聊自試  
衰疾致身閒  
四壁寧虞盜  
多方莫駐顏  
無風回遠笛  
有月待人還

次韵夜雨

暗雨來何急  
寒房客自醒  
驟看燈閃閃  
擬對竹青青  
聲到江干盡  
風回葉上聽  
更長那得曉  
欹側想儀刑



晦日

人老時情薄春深花意微  
暄寒南北異風俗古今違  
即事無同異旁觀有是非  
食蔬如許瘦飽肉未須肥

登城樓

城郭春容晚因行可當遊  
飛來雙蛺蝶自盡一浮鷗  
嶮山將合江平水却流同  
來端興盡且為小遲留

奉賀陳聖子

合譜兒童歲為僚一再秋  
初聞消息報已作別離憂  
急雪將無路寒江欲斷流  
相逢寧易得端為小遲留

和王子安至日三首

近節翻多事為家不亦難  
老成須藥力愁絕向誰寬  
凍雨能妨夢朝霜故作寒  
衰顏心自了不待鏡中看  
物理有終極人情從往還  
陰陽消長際老疾去留間  
申白徒懷惠巢由不買山  
更歌吾和汝風日稍侵顏  
晨起公私迫昏歸鳥雀催  
百年忙裏盡萬事醉間來  
竹雨深宜晚江梅半欲開  
風燈挑不焰寒火撥成灰

送張衡山

昔別青衿子今為白髮翁  
此行何日見多難向來同官



事酣歌裏湖山秀，句中風塵莫回首。留眼送歸鴻。

除夜對酒贈少章

歲晚身何托，燈前客未空。半生憂患裏，一夢有無中。髮短愁催白，顏衰酒借紅。我歌君起舞，潦倒略相同。

庚辰三月上旬登白門閒望

昔別子未仕，人言詩有神。預知河嶺阻，不作往來頻。賸喜今猶學，須知祿爲親。五陵花滿眼，作意莫禁春。

送王君玉赴試

汝穎諸王後，風流獨此人。談鋒堅百戰，筆力舉千鈞。得

士吾無愧，多聞子未貧。平生三學士，相見定相親。

奉送閻醇老推官

古今猶異俗，鄒魯尚多儒。簿領三年責，雲霄一武趨。數過忘潦倒，惜別更斯須。說與晁夫子，今年雖也無。

答李簿

老去才先盡，春來酒屢空。甘爲耕釣手，畏作囁嚅翁。與罪寧無說，言詩新有功。不堪須野鷺，似欲吐長虹。

九月十三日出善利門

十載都城客，孤身冒百艱。一飢非死所，萬里有生還。去



國吾何意歸田病不關共看雙白鬢似得半生閒

送章推官

從事有多譽還家能少留持杯猶賴尾解纜即沙頭好事今猶壯論文老自休風埃留我老說與五湖秋

湖上晚歸寄詩友四首

鬢髮難藏老湖山穩寄身却尋方外士招作社中人霜葉深於染秋花晚自春無人還有碍詩卷莫辭頻  
蓑笠宜多病衣冠錯致身清愁偏待客白髮解禁人江月深留雪山梅借探春興從湖上發詩爲道人頻

功名違壯志戒律負前身劉德長欺客王融却笑人殘

年憎

一作送

受歲病眼怯

一作却

逢春杖履知何向如公未

厭頻

紅綠羞明眼欹斜久病身年齡不待命湖海却留人點  
滴花間露新鮮柳上春情懷將底用詩外不須頻

寄答顏長道二首

薄命猶多難浮生未定居故人憂已矣千里問何如白  
髮羞明鏡青燈怯細書不曾知史館何用索枯魚  
貧病憂居士雕蟲累壯夫不能羞齒頰幸免葬江湖疲



馬甘垂首遊鷹不應呼為誰歸未得山水故鄉居

春晚遊寶雲寺

繁杏青猶小幽花落更香日隨雲雨斷恨與水風長  
蠟子何緣鬪蜂兒有底忙山人能棄世遊子不思鄉

夏日書事

花絮隨風盡歡娛過眼空窮多詩有債愁極酒無功  
家在斜陽下人歸滿月中肝腸渾欲破鬼夢更無窮

晚遊九曲院和章秀才

冷落叢祠晚回斜狹路賒平荷留夜雨驚鳥過隣家雲

暗重重樹風開旋旋花病身無俗事待得後歸鴉

次韵順法師十三間樓避暑

窗暗時時雨門開處處山心蘇解衣後愁破立談間  
枕簟長相往功名久不關論文非小陸媿色滿顏

賀閔彥長生日

吉夢熊羆後名家韋杜豸風霜隨氣節河漢借文章  
漢相功名晚周南德化長欲申千歲祝願奉故人觴  
經術宜傳世清明正得秋德優高士傳名重賦家流  
短袖妨妍舞青衫負白頭待看靈壽杖扶出富民侯



錢塘寓居

山水如相識豪華異昔聞聲音隨地改吳越到江分門  
閉蕭蕭雨風催緩緩雲會隨麋鹿去長謝犬羊羣

寄寇荆山

曠士三年別荆山一顧中百千人欲死四六老能工脫  
帽頭應白求田意欲東口須論世事目已失飛鴻

還江山

夜夜滄洲夢歸心劇旆懸呼童買輕舸拂榻下平川溯  
浪潮如鬪凌風岸若牽江鄉厭回首足及棟花天

雜題二首

亂水交如線羣山翠作屏寒輕春稍稍雪盡麥青青霜  
草猶疑滑風林漸喜聽生涯鞍馬上歲月短長亭  
泥雪才通腳煙雲復結陰遲留隨處處簾幕靜沉沉去  
鴈懷歸意來禽欲好音稍寬溝壑辱不憚二毛侵

秋後五日應物無詩豈年志俱壯未解傷秋耶  
以詩挑之

伏盡暑猶壯秋生涼故遲蟬吟接遠響螢燭度深枝歲  
半身仍健年侵意自悲情知寇公子不作感秋詞



寄晁說之

閱世真難記如君自不忘向一作尚於書太簡正以懶相妨與有還家樂終無却老方莫須憂潦倒未許細商量

再贈寇司戶

仕宦諸儒底名成一戰中酒為千日計詩費幾生功戲馬章臺下呼鷹上蔡東少年豪狹窟杵臼得梁鴻

巨野泊觸事

蒲港牽絲直平湖墜鏡清順流風借便捷路雪初晴鳥度欲何向鷗來只自驚有行須真一作快意安得易為情

東阿

慟哭東阿縣傷心莫與論却思當痛日敢望此身存舉目人將母回頭影吊魂更堪悲手足孤稚滿船門

甲亭

峻壁亭臨水橫陂樹徹山兩河惟甲氏數栢共蒼顏隨意遊成適回舟月與還早知乘下澤不再結青綸

遊鵲山院

積石橫成嶺行楊密映門人聲隱林杪僧舍遶雲根頓攝塵緣盡方知象教尊只應羊叔子名字與山存南豐先生



出守日常  
遊是院

### 登鵲山

小試登山腳今年不用扶微微交濟灤歷歷數青徐樸  
俗猶虞力安流尚禹謨終年聊一快吾病失醫盧

山因  
鵲

### 別威德寺

三宿城隈寺輕齋類老禪暫來真偶爾適去更翛然笑  
別留春塢行尋下瀨船此身猶斲梗飄泊且隨緣

### 雜題

春水漲湖田先尋滬瀆船隔江爭問主入市不論錢味  
得尊尤滑香因豉更便他年棟花落追憶漫流涎

### 和董判官寺居作

共作東州客同棲古寺深論交非有舊不見解相尋冷  
過清明節悲生故國心此身隨所寄未足問升沉

### 贈白闍黎

餅錫倦西東歸來一榻空宗乘能自判文學更兼通講  
徹夜堂月定回枯樹風無從叅淨社回首倦飛蓬

### 舒御史太夫人挽詞



後山詩卷三  
回合蔣山秀佳城去域中珮環無曉日蘋藻自春風  
斷髮人何在捐金事已空遂移男子孝更作直臣忠

和賈明叔秋晚見懷

陋巷少行迹故人車馬稀世情方汨沒吾道肯依違  
萬葉迎風脫孤雲帶月歸獨憐高義在猶肯問柴扉

望夫石

磧戍人何在秋霜志不移無言息媯怨有淚舜娥悲  
山靜雲盤髻江空月印眉誰將望遠意歌作送征詩

夏杪

一室青蕪長終朝靜不譁聖賢開美酒子母破新瓜  
綠篠初翻籜紅蕖稍薦花咄嗟功業晚覽照鬢初華

虞美人草

幽艸默通神舊題虞美人長言方度曲應節若翻身  
律呂聲相應雲龍氣自親無情猶感會不獨在君臣

沈道院有水墨壁畫奇筆也惜其窮年無買之  
者賈明叔請余同賦

壁間水墨畫爲爾拂塵埃草樹精神出溪山氣勢回路  
從沙嘴斲人自渡頭來莫怪知音少牙絃匣不開



同蘇不疑避暑法寺

酷暑不可處相將尋畫涼清談廕廣厦甘寢就方牀蓮  
劍明珠滑瓜浮紺玉香因知北窗臥自信出羲皇

和彦詹題遠軒

開窗得遠意興出杳冥間芳草日邊路片雲天外山好  
花和露斲修竹夾藤刪每許南鄰伴時來一寄顏

寄君玉

不見紫霄翁侵尋鬢已蓬倦遊鄉域異歸夢夙宵同愛  
酒貧應甚吟詩老更工清時公道在未足歎途窮

次韵遊花洞

遠洞容徐步繁英故壓枝錦衾堆襞積春事向離披作  
意真成誤尋芳似較遲預為來歲約及早共瑤卮

夜坐有懷一作秋懷

瑣瑣重門閉蕭蕭一再更一作稍稍昏煙短檠昏一作看

細字高枕笑一作忘平生來鴈防身早一作來鶴秋新一作妨身健

陽換眼明已須甘酒力不用占時名一作永言隣里  
舊心肯向人傾

送張芝卿

相逢已偶爾告別更蒼然離合驚時換行藏乃世緣君



無學干祿我亦賦歸田泗水秋山外長安夕照邊

行次舊縣寄立之

歲晚方奔命春期作過賓逢君爲地主顧我拙謀身官  
是三年客情緣一日親將身隨斗食應作未歸人

送晁奉議高郵判官

公族仍前輩都城早與遊士窮須祿食才大豈身謀雪  
嶺無歸鳥冰河有去舟平生湖海意不爲有魚留

五言排律

同道士錢冷然尋澗水源

曉領黃冠子步尋東澗源拖筇探清淺垂手弄潺湲岸  
閣殘花片槎留舊漲痕鳳潛丹穴邃龍臥古潭渾修竹  
青垂蔭長蘿翠可捫忽驚穿藥圃不覺到雲根磴外看  
飛鳥崖邊見飲猿援琴寫山水布席坐蘭蓀白石支碁  
局青沙藉酒樽醉歌歸路穩洞口月黃昏

五言賀雨

六月鄞江旱焦勞刺史憂戴星趨洞府踏月叩龍湫引  
咎青章設爲壇古法修山川將爾徧牲幣豈吾留帝意  
茲回眷神聰俯應求油雲潛感召靈雨忽滂流急勢朝



後山逸詩卷三  
翻幕寒聲暮咽溝餘波平浦嶼翠色蔽田疇池閣消殘  
暑間閭慶有秋邦民無以謝惟起載途謳

後山先生逸詩卷三

後山先生逸詩卷四

後學 陳唐 編

七言律詩

寄文潛元咎少游三學士

北來消息不真傳南渡相忘更記年湖海一舟須此老  
蓬瀛萬一作方丈自飛仙數臨黃卷聊遮眼穩上青雲小  
著鞭李杜齊名吾豈敢晚風無樹不鳴蟬

連日大雪以疾作不出聞蘇公與德麟同登女

郎臺



掠地衝風敵萬人蔽天密雪幾微塵漫山塞壑疑無地  
投隙穿帷巧致身晚積讀書今已老閉門高臥不緣貧  
遙知更上湖邊寺一笑潛回萬室春

是日賜柴米

立春

馬蹄殘雪未成塵梅子梢頭已著春巧勝向人真奈老  
衰顏從俗不宜新高門肯送青絲菜下里誰思白髮人  
共學少年天下士獨能濡溼轍中鱗

贈王聿修商子常二首

欲作新詩挑兩公含毫不下思先窮貪逢大敵能無懼

強畫修眉每未工畏病忍狂妨痛飲晚雲朝雨滯晴空  
正須好句留春住可使風飄萬點紅  
朱櫻青子已嘗新白恰黃衫見未頻載酒對棋無俗士  
閉門高枕有閒人有底百年須薄祿相看一笑却關身  
肯留惡客開家釀驚坐何人更姓陳

次韵敬酬元弼三兄

冥冥兩力及時來冉冉春光作意回白髮尚堪供語笑  
青衫不惜著風埃林廬要自家家到樽酒寧辭日日開  
只恐未便文字飲人間無夢到陽臺



和賈耘老春晚

縈縈裏裏幾絲飛  
榴葉千燈照晚暉  
紫翠園林鶯欲懶  
黃昏簾幕燕初歸  
花明西苑將迎幸  
艸綠平原正打圍  
一臥海城春又晚  
不妨閒處得真機

次韵寇秀才寄下邳家兄

少共千憂老一官  
中間毀譽兩茫然  
去留有命真如此  
俯仰從人却未然  
故著江山供極目  
正將強健入新年  
驚逢小杜風流勝  
信有衣冠不乏賢

賀文潛

飛騰無那高詹事  
奔軼難甘杜拾遺  
釋梵不爲寧顧計  
公侯有命却隨宜  
且留陳迹來韓愈  
不用逢人說項斯  
富貴風聲真兩得  
窮人從此不因詩

送章氏兄弟兼寄金山寧禪師

未塗一過馬羣空  
老眼雙瞻碣石鴻  
固有江東兼渭北  
其如明月與清風  
一官羈絆吾堪老  
萬里嫖姚子未窮  
寄語此時懷馬祖  
叩門何日許龐公

寄曾公權

趙世功名子有憑  
過人材藝我何曾  
詩書忘廢難支敵



門館光華却再登捐棄妻兒逃世累掃除鬚鬢伴禪僧  
待君持節東南日試問當年杜伯升子瞻詩云欲識當年杜伯升飄然雲水一孤僧

次韵關子容湖上晚飲

風樹吹花落四鄰暮雲將雨作催人旋傾美酒留連客  
急作新詩報答春試傍清湖看鬢髮莫辭行樂費金銀  
如今歸去還高臥更問風光有幾旬

和休文至日新安

無成底事到天涯重見春工換柳枝歷盡江山苦行役

歸來風雨過花時驅馳共厭人間世險阻時聞別後詩  
獨有窮愁銷未盡一番相見一伸眉

酬應物見戲

扣門賞竹任推排興盡歸舟挽不回平世山林成偃蹇  
新年詞句得參陪醒心正賴揮毫疾誤筆仍煩送喜來  
書省不應須乳媪何承天老為著作而同官皆少一時年目為乳媪來詩有館殿之句一時  
除目盡英才近除秘書正字皆天下之選

城南

白下官揚小弄黃騎臺南路綠無央含紅破白連連好



度水吹香故故長躡滑踏青穿馬耳轉危緣險出羊腸  
孰知南杜風流在預怯排門有斷章

次韵揚内翰贈諸進士

一官歸老豈嘉賓喜見羣材入選掄學變古今人得意  
化行梁楚俗還醇士蒙餘勇天同力詩度清秋物再新  
勉作功名收善頌徑從平地據通津

次韵寇司户春懷

諱窮懷祿得辭勞腰折頭低不復高夢幻更堪追鳥迹  
去來何有拔牛毛依違玩世從君好咤叱生風蓋代豪

聞說妙年心尚在忍看花絮受風飄

陳詢秀才歸徐

千里相從愧子心未堪歸路馬駸駸更能作意憐衰病  
肯復重來道古今三歲有期看一舉百年聊待到千尋  
行逢淨社論餘習為說登臨久廢吟

登彭祖樓

城上危樓江上城風流千載擅佳名水兼汴泗浮天闊  
山入青徐煥眼明喬木下泉餘故國黃鸝白鳥解人情  
須知壯士多秋思不露文章世已驚



寄子開

致君意氣日方中許國精誠月貫虹一代英豪出門第  
當時毀譽豈窮通風流身致義皇上日夜心隨汲洛東  
從使少年輕我輩只留顏面對吾公

寄徐吉父學士

臥龍山上摘黃花曾共西風醉帽斜當日已應天下樂  
無人傳入畫圖誇低頭強笑今何似多病難堪懶自嗟  
聞道承明方厭直幾時來伴訪山家

和南豐先生西遊之作

孤雲秀壁共崔巍倚壁看雲足懶回睡眠緣寒綠洗  
醉頭強爲好峰擡山僧煮茗留寬坐寺板題名卜再來  
有媿野人能自在塵樊束縛久低徊

和南豐先生出山之作

側徑籃舁兩眼明出山猶帶骨毛清白雲笑我還多事  
流水隨人合有情不及鳥飛渾自在羨他僧住便平生  
未能與世全無意起爲蒼生試一鳴

和張次道再遊翠巖之作

去歲尋山有舊題重來似與故人期回巖俯仰如迎客



後山遺言卷四  
六  
流水喧鳴擬索詩嶺路依危通鳥過吾身趁健白雲隨  
自憐久快屠門嚼欲住安能久茹芝

初到錦城

溪遶層巒路遶溪飛梁相接挂晴霓山川王氣今何有  
岩谷靈蹤昔未躋十里松篁參羽仗半天樓閣倚雲梯  
勝遊欲盡無窮目未到桃源客已迷

何復教授以事待理

負俗寧能累哲人昔賢由此致功名驥收鹽坂車前足  
琴得焦桐爨下聲三獻荆山時未識一鳴齊鳥衆方驚

傳聞下詔搜遺逸勸講方思用老成

和富中容朝散值雨感懷

節物驚心懶復嗟樽中酒盡復誰賒風撩雨腳俄成陣  
雪閣雲頭欲結花萬里可堪長作客一年將盡未還家  
自憐落落終難合白首詩書謾五車

謝贊闈黎見訪

好在談經老上人衝風踏雪到江濱百篇出篋自新得  
一鉢隨身依舊貧終歲杜門逃俗士爲師設榻對修筠  
蒲團藜杖焚香坐此意此時無點塵



和蒲左丞有美堂座上觀雪二首

高牙大纛曉登山卷帳飛觴不避寒十二玉樓橫閣道  
三千鐵甲壯師干封修已驗遺蝗化平隴寧虞宿麥乾  
預喜豐年惟太守旋追賓從促杯盤  
破曉初驚失舊山瑤臺化出坐中寒江心凍合愁蛟蜃  
匣裏冰生吼莫干門閉洛陽人跡絕指穿東郭履痕乾  
鳳池不比梁園客咳唾珠璣落玉盤

和秦太虛湖上野步

曉風疎日乍相親黯黯輕寒拂拂春觸目漸隨紅蕖亂

經年不見綠條新寧論白黑人間世懶復雌黃紙上塵  
十里松陰窮野步暫時留得自由身

和沈世卿推官見寄

倦看世態久低徊且置窮通近酒杯未忍一身閒處著  
暫容雙眼醉時開爲呼阿武扶頭起擬與山公倒載回  
好在東籬舊時菊無心準擬白衣來

和劉元樂月夜寄賈耘老

胡牀欲上庾公樓那復周南歎滯留皓魄光連鮫室午  
疎星冷浸洞庭秋錦袍有興思姑孰桃楫無心問暮愁



喚取長江來入社不勞牛渚問行舟

酬呂明父學士

當日功名指顧收一言悟主遇千秋去登霄漢如平地  
歸到雲山尚黑頭解組行叅蓮社客揮金坐揖醉鄉侯  
謝公不爲蒼生起擁鼻重來可自由

送傅子正宣義

漸漸烏竿五兩輕一帆秋色下江濱請纓北闕非無意  
捧檄南州且爲親神驥解韉天上足風鵬搖翮日邊身  
歸途眯眼塵沙惡夢想西湖十里春

和元樂銷暑樓曉望

遶郭溪山接四隣身在步躡一梯雲圖南羽翮搏空見  
倚北光芒入夜分蕪沒池臺餘故事風流人物想前聞  
翛然便欲思招隱猿鶴還見舊羣

和寄朱文中

仰高當日誦成規想見風流盛一時魯國故知臧有後  
孔庭早見鯉能詩侵尋末路同傾蓋邂逅清談爲解頤  
願借湖山容膝地爲令松菊寄吾衰

和王明之見寄



末路相逢首重回紫芝者字向人開老來惟有風情在  
事去空憐歲月催憔悴不堪臨楚澤樓遲無路上燕臺  
少陵肺病疎杯竿想負花前載酒來

和酬施和叟宣德

山陰傾蓋兩綢繆十載重來鬢已秋往事侵尋如昨日  
故人牢落半滄洲流離道路生涯拙蕪沒田園歲計休  
久要尚憐君子在為言雞黍亦遲留

呂使君生日

司漏凌晨報曉籤瞳瞳赫日上重簷良辰已應純乾策

吉夢先符大卜占棣萼同時升紫禁棠陰由此駐彤襜  
一杯欲助邦人禱願借黃堂壽筭添

送澤之過維揚

夢裏揚州十載間青樓陳迹故依然袍爭爛錦催詩筆  
雨濺明珠落酒船顧我老無騎鶴興羨君行及看花天  
囊中秀句歸應滿不負韋郎五色牋

和和叟第課還自都下

青雲直上馬如龍來往冷然若御風高步只應天咫尺  
舊遊寧寄浙西東升沉道路從今異邂逅比鄰此日同



相見可堪懷抱冷，需君健語破樊籠。

和和叟梅花

百卉前頭第一芳，低臨粉水浸寒光。  
漢房陵有粉水卷簾初認  
雲猶凍，逆鼻渾疑雪，亦香鼎實自期終。有待天真不假  
更勻粧，江南望斷無來使，且伴詩翁入醉鄉。

再到錢塘呈會宗伯益

負笈重來感舊遊，流年衰鬢兩經秋。湖山依舊渾相識，  
風月愁人不自由。尚有故交重冷榻，可堪歸夢到滄洲。  
誰憐壯志空凋落，百鍊今為遠指柔。

簡楊安國

侯門誰預識馮驩，歲晚寧知范叔寒。傾蓋尚憐吾道在，  
立談相信古人難。開懷磊落無城府，握手侵尋出肺肝。  
共許異時終此去，滿冠塵土待君彈。

簡李伯益

齏鹽度歲每無餘，垂橐東歸口未餬。貧裏交遊新斷絕，  
老來光景半消除。時情視我門前雀，人好看君屋上烏。  
尚喜敝廬連蔣徑，願求佳句遞髯奴。

九日無酒書呈漕使韓伯修大夫



後山詩集卷四  
十一  
老大悲傷節物催酒腸枯涸壯心灰慚無白水真人分  
難置青州從事來倦筆懶從都市出醉眸剛為麴車回  
黃花也似相欺得坐對空樽不肯開

過杭留別曹無逸朝奉

陳蕃解榻為留連俯仰徒驚歲月遷故意斯人奈風雨  
多情於我獨山川可憐顏貌非前日依舊窮愁似去年  
後夜相思隔煙水夢魂空寄過江船

簡令由司理

居連里巷室連囊多謝能容鑿壁生幸有餘光子何損

豈無隣好我先傾已知涉世蘧蘧夢但欲求田俛俛耕  
貧病久甘從棄置寧堪更累汝南評

張謀父乞花

二頃田園汴泗東春來心事幾人同固知短綆無深汲  
又見新花發舊叢光氣著人渾欲醉妍華過眼旋成空  
冷官門外一作戶無消息與報江南春信通

寄子閔

道山清絕况真仙杜曲風流最近天曹濮於今真樂國  
股肱從昔著時賢今回不辨終朝語此去無端久疾痊



後山先生逸詩卷四  
可念臥如遭末劫親陳埋沒不知年

後山先生逸詩卷四

後山先生逸詩卷五

後學 陳唐 編

五言絕句

江湖堂

莫愛西湖好涓涓去不回無情是江水猶解及時來

眠雲齋

已是登臨晚長須愛惜春終當捐世事來作臥雲人

擬李義山柳枝詞五首

江清沙日暖雄鴨雌鴛鴦相看不相識花晚褪紅香



裊裊東門柳重重小苑花爲誰須落子著意莫藏鴉  
雨葉不自持風花故入衣飛花已無定忍著惡風吹  
伏雌將沙驚水陸不相直鴨鴨橫波去嗚嗚呼不得  
莫解丁香結從教長苦辛却因千種恨別作一家春

萱艸

喚作忘憂草相看萬事休若教花有語却解使人愁

七言絕句

嘲无咎文潛二首

詩人要瘦君則肥便然偉觀詩不宜詩亦於人不相累

黃金九鑲腰十圍

一飢緣我不緣渠身作賈孟行詩圖窮人乃工君未可  
早據要路安肩輿

寄都下故人示王子安

湖海相忘目自疎經年不作一行書世間惟有韓康伯  
肯爲淵源住歲餘

擬漢宮詞三首

葉葉霜林著意紅翩翩行騎語墻東黃金擬買長門賦  
未信君恩屬畫工



後山遺言卷五  
月與秋期特地圓花隨人意作春妍却因姊弟爭珠鳳  
更欲君王意外憐

帳底吹煙香自薰鏡前含笑意生春經年不道君恩薄  
却是恩深更誤人

秦少章見過

淮南小山秦氏子舊雨不來今雨來風席起簷晨突冷  
坐看鳥跡破蒼苔

絕句

老著江湖才一得病占風雨漫多知身將白鳥同歸月

夢到黃梁未熟時

十八日觀潮四首

一年壯觀盡今朝水伯何知故晚潮海浪肯隨山俯仰  
風帆長共客飄搖

眼看白浪覆青山誰信黃昏去復還縱使百年終有盡  
何須豪橫詫吳蠻

千槌擊鼓萬人呼一抹濤頭百尺餘明日潮來人不見  
江邊只有候潮魚

江平石出漲沙浮船閣平洲水斷流朝暮去來何日了



後山詩卷五  
三  
一杯誰與吊陽侯

十七日觀潮三首

潮頭初出海門山千里平沙轉面間猶有江神憐北客  
欲將奇觀破衰顏

江水悠悠自在流向人無恨不應愁相逢不覺渾相似  
誰使清波早白頭

漫漫平沙走白虹瑤臺失手玉杯空晴天搖動清江底  
晚日浮沉急浪中

月下觀潮二首

隔江燈火是西興江水清平霧雨輕風送潮來雲四散  
水光月色鬪分明

素練橫斜雪滿頭銀潮吹浪玉山浮猶疑海若誇河伯  
豪悍須教水倒流

宿錢塘尉解

平湖遶舍山無盜官事長閒俸有金安得終身為禦寇  
不辭兒女作吳音

寄北山順法師二首

十年聞問不逢人一面相逢過所聞高士不應輕俗士



欲將汗腳上乘雲  
山下遊塵不汙人耳邊溪水去猶聞羨君身世渾無事  
坐看青山過白雲

贈大素

軻律師二首

山居不出十四年矣

林間細路暗通門火閣深藏雪裏春自笑世間千計錯  
羨他湖上十年人  
枕帳清寒夜色空琉璃明淨晚燈紅定知城市無窮事  
盡在山人冷眼中

贈寫真禧道人

久病多愁易老身塵容衰鬢不長新早須置我山巖裏  
不是麒麟閣上人

次韵性都正北山逐涼

海風吹雨過梅黃叢竹留陰借晚涼更欲從君談妙理  
鳧脰能短鶴能長

叔父惠鉢三首

當家父子親分付不比黃梅萬里來不解當年明上座  
嶺頭言下却空回

蒲團未有祖師意洗鉢何曾識趙州萬里空歸君解否



老胡端為我能留  
聲中得句已忘言  
斲酒持齋却自然  
大有西來真的意  
飢時著飯飽時懸

次韵蘇公謁告三首

靜中有業官成集  
醉裏無何老是鄉  
文寶向來無一物  
却須天女與拈香  
竭澤回波不作難  
未應平地起風瀾  
是身非有從何病  
試下先生一著看  
紙帳薰爐作小春  
狸奴白牯對忘言  
更無人問維摩詰

始是東坡不二門

放歌行二首

春風永巷閉娉婷  
長使青樓誤得名  
不惜捲簾通一顧  
怕君著眼未分明  
當年不嫁惜娉婷  
抹白施朱作後生  
說與旁人須早計  
隨宜梳洗莫傾城

戲元弼四首

濁涇清渭不同源  
世好因循到子孫  
只待白頭能潦倒  
不虞青眼已瀾翻



山頭落日著窗明  
花裏來禽起笑聲  
豈有詩成須白傳  
獨於酒可置公榮  
翩翩別去七經年  
時特歸來兩浩然  
東道有時推謝令  
後堂無地著彭宣  
車馳卒奔風雨過  
白髮故人餘一箇  
幸是元無左阿君  
何須不著陳驚坐

送王生兼寄西堂圖澄禪師

未仕寧論馬少游  
虛名非復韓湖州  
祖師若問西來信  
爲說蒼頭與白頭

讀白樂天臨水坐詩

西方社裏收身早  
白髮人中得計長  
不作北門東掖客  
更無閒事可思量

次韻黃無悔惜梅

雪擁寒門鵲不來  
江南春信小遲回  
遙知詩力生春早  
一抹江梅趁眼開

酒戶獻花以奉先聖戲作

蕭蕭竹雨亂鳴鴉  
裊裊風窗暗碧紗  
玉座塵埃香火冷  
酒家來獻一枝花



後山逸詩卷五  
謝田氏

登門執別有不答慚愧公家父子孫顧我何堪能至此  
正緣同德又同門

南臺

城郭收燈興未休却回春信到臺頭東風未借登臨便  
柳色遙看特地愁

馬上口占呈立之

廉纖小雨溼黃昏十里塵泥不受辛轉就鄰家借油蓋  
始知公是最閒人

後山先生逸詩卷五終



國

國  
藏書

卷之三



